


# Malet

## Mullet (Mugilidae)



**Bolfae malet**  
Fringlip mullet  
(*Crenimugil crenilabis*)



**Yelo tel malet**  
Squaretail mullet  
(*Liza vaigiensis*)



**Flathed malet**  
Flathead grey mullet  
(*Mugil cephalus*)



### Spisis mo distribiusen

**Family Mugilidae hemi inkludim 80 defren spisis blong malet we oli stap long ol wota we i kolkol smol mo long ol tropikal wota raon long wol.**

Ol malet oli gat tu seperet fin we i stap antap long bak blong olgeta, mo maot blong hem i olsem wan traeankele. Kaen malet we komon nem blong hem i flathead o striped mullet, sam taem oli kolek sea mullet, *Mugil cephalus*, hemia men malet long Saot Pasifik. Spisis ia kala blong hem i wan grin we i dak long bak blong hem, mo silva long saed mo bel blong hem wetem seven laen we i dak long saed blong bodi blong hem.



### Ples we fis i stap long hem mo kakae blong hem

**Ol bigfala malet oli laef long ol salo eria long kos, plante taem long oli grup we oli kolek skul, ova long sanbis, sofmad o bed blong si gras go daon kasem dip blong 10 m. Olgeta i save go insaed long ol riva be hemia i no minim se oli nidim riva wota.**

Malet oli muvmuv plante long dei, long taem ia ol bigfala malet oli kakae ol plant mo smol animol (olgeta we oli no gat bon long baksaed blong olgeta), mo oli pulum ikam long maot blong olgeta ol toti we oli stap long bed blong solwota. Plante taem olgeta oli go long ol grup blong kakae long ol smol plant we oli gru long ol si gras. Ol bigfala fish olsem ol snapa mo barakuta oli kakae malet olsem kakae blong olgeta.






## Riprodaksen mo saekol blong laef

*Malet i gat tu seperet seks, i gat woman fis mo man fis, mo oli rere blong mekem pikinini taem oli 3 kasem 4 yia long wan saes blong 30 sentimita. Olgeta oli save gru kasem wan longfala blong 60 cm mo wet blong 4kg mo sam oli save kasem 100 sentimita mo stap laef kasem 16 yia.*

Evri yia ol malet i muv long wan longfala distens folem kos blong kasem ples we i dip lelebet blong mekem pikinini long grup. Long taem blong mekem pikinini, wan woman fis (♀) i givim aot plante eg, hemia i ova long 1 milian, mo ol eg ia sperm blong man fis (♂) we i kapsaetem i fetalaesem olgeta. Ol eg we i fetalaes oli brok mo putumaot ol smolmol larvae we oli flot long solwota.

Afta long 2 go kasem 3 manis, aot long evri taosen smolmol larvae, anda long wan i laef olsem pikinini fis mo i go swim igo long eria we wota i salo. Mo aot long evri hundred pikinini fis, anda long wan i save laef long 3 kasem 4 yia we i tekem hem blong gru mo kasem saes blong mekem pikinini.



## Fasin blong kasem fis

Plante taem ol fisa i kasem ol malet wetem cast net, gill net, bij seine net, ring net mo trap. Oli yusum ol trap wetem fanis we oli bildim long raet ankel long so blong pulum ol fis we oli grup i go blong mekem pikinini i kam insaed long wan bigfala ples we i save holem taet olgeta.

Oli save kasem ol bigfala namba blong malet from oli stap muv tugeta folem kos blong go mekem pikinini long grup. Fasin blong fising olsem i no gud from olgeta fis ia we oli go blong mekem pikinini i olgeta we bae oli mekem ol smolmol fis, we aot long olgeta plante oli save gru mo stap rere blong oli kasem olgeta long fiuja.



## Ol kaen fasin blong manejmen we yu save jusum

*Ol fiseriss blong malet oli bin kontrolem olgeta wetem sam difren kaen rul.*

From ol malet we i muv igo long kos evriwan i ol bigfala fis we i rere blong mekem pikinini mo evriwan i sem mak saes i no wokaot gudwan blong yusum ol saes limit. Blong yusum wan ban long saes blong hol blong net o trap fasin ia tu i no stret (from i gat smol namba nomo blong ol smol fis we i traem blong pas tru long hol blong net we hol ia i no damejem olgeta).

Oli bin putum tu ol limit blong namba blong fis we oli save kasem long wan taem (bag limit) be ol fis we oli kasem long ol bigfala net mo trap plante taem i plante tumas, mo olgeta we oli i letem aot olgeta we i antap long namba blong limit janis blong olgeta i save stap laef i smol nomo.

Blong setemap ol tabu eria we komiuniti i stap manejem i no save helpem tumas from ol fis ia oli muv olbaot plante (migrate) olsem ol malet mo i no save protektem olgeta fis ia taem oli stap muv long kos long grup blong mekem pikinini.

Wan long ol problem blong manejem ol fiseriss blong malet hemi from plante defren komiuniti i kasem olgeta fis ia taem ol muv folem kos (migrate). I no gat yus blong wan komiuniti nomo i protektem muvmen blong malet sipos we komiuniti we i stap klosap long hem i stap kasem olgeta taem oli muv igo. I gud tumas sapos ol komiuniti i save wok wanples blong yusum sem fasin blong manejmen. Fasin blong manejmen we oli sud agri long hem hemi blong letem inaf long ol malet blong kasem eria we oli go long hem blong mekem pikinini mo produsim ol smolmol fis, we plante long olgeta i save gru blong kam bigfala fis we oli save kasem olgeta long fiuja.

Ol fasin blong manejmen we komiuniti i save wok tugeta blong mekem i save inkludim:

- putum wan ban long ol gill net mo fanis trap long taem blong muvmen blong ol malet we oli go blong mekem pikinini - we maet i no yusful tumas from malet i no isi blong kasem tru long eni nara fasin blong fising. Maet wan nara fasin we i save wok hemi blong:
- ristriktim namba mo saes blong fanis trap mo longfala blong gill net we ol fisa i alao blong oli yusum long taem blong muvmen blong malet (migration), we i save wok gudwan mo sapos oli mekem olsem:
- putum wan ban long ol gill net mo fanis trap long sam eria we oli save kasem evri malet long wan grup taem oli fising. Maet ol eria ia i save inkludim ol smol pasis bitwin long so mo ol rif we grup blong malet oli mas pas tru long hem.

